

بِسْمِ اللَّهِ الرَّحْمَنِ الرَّحِيمِ

KHUTBA JUMMAH

HADHRAT AMIR'UL MUMINEEN MUHYI-UD-DIN

Munir Ahmad Azim

22 Mai 2015 ~
(03 Shabân 1436 Hijri)

(Résumé Khutba)

Après ki li fine salué tous so bane disciples (et tous bane musulmans) du monde entier par « Assalamoualaikum Warahmatullah Wabarakaatuhu » Hazrat Muhyi-ud-Din fine commence so Khutba Jummah avec Tashahhud, le Ta'ouz, Surah Al Fatiha, et ensuite li fine dire:

Alhamdulillah, mo contigné aujourd'hui lors le sujet de bane l'enseignements morales et bane sentiments naturels de l'homme.

De ce fait, le deuxième principe concernant bane l'enseignements morales d'ene religion c'est ki, en plusse ki li bizin indique bane l'occasions approprié pour l'exercice de sak qualité morale, ene religion bizin donne ene explication de bane différentes l'étapes de bane bons ou bane mauvais morales ki susceptible pou résulter de, soit bon ou mauvais l'exercice de sak instinct naturel, parski, si sa religion là omette pou fer sa, alors, la plupart de bane dimounes ti pou désorienté, et soit zot ti pou renoncé dans zot bane zéffore au commencement même de zot stade pou tente pou améliorer bane moralités, ou soit zot ti pou emprunte bane chemins ki zamais ti pou capave conduire zot à l'objectif ki zot ti bizin atteindre. Zot ti pou couma ene étudiant ki, du moment li envie apprane anglais, alors li commence apprane dictionnaire Oxford par cœur. Sa bane kalité dimounes coumsa là ti pou fer bane sacrifices de zot lé temps et zéffores, mais zamais ti pou arrive à kit résultat utile. C'est, par conséquent, le devoir d'ene religion pour illustrer bane différents l'étapes de bane qualités morales, de sorte ki bane dimounes dans tous bane stades de développement zot en mesure pou profite de so bane l'enseignements.

Troisième principe c'est ki ene religion bizin explique bane bases lors quoi so bane injonctions morales fondé, parski, sans la connaissance de sa bane bases et commandements là, l'homme pas ti pou conne sa sentiment de joie ki nécessaire pour soutenir zéffore nécessaire pour la réalisation d'ene haute standard ou statu moral.

Quatrièmement, ene religion bizin indique ou précise source de bane bons et mauvais penchants, et li bizin enseigne à bane dimounes couma bloque bane canales du mal et ouvert celui du bien, parski le mal pas pou capave détruire sauf kan bane mauvais penchants et bane passions (*nafs*) pou détruire, et à moins ki la religion traite sa l'aspé de sa problème là, so bane l'enseignements morales pas pou vine parfait. Ene simple principe abstré pas pou capave être d'ene grand aide, à moins ki ene explication donné lors zot travail pratique, et c'est saki mo fine fer. En vérité, le Quran Shareef traite et illustré tous sa bane l'aspé du développement moral de l'homme, et donc li fine établi ki seul l'Islam li sa véritable guide moral de l'humanité.

Ene l'autre fonction d'ene religion parfait c'est pou établir ene principe ki bizin gouverne l'aspé sociologique de la vie de l'homme et ki, kan li pou suivre sa, le régime politique et la civilisation pou capave être perfectionné, et la paix et l'ordre pou capave être établi dans le monde. L'Islam à travers so bane l'enseignements fine fer découvert au monde bane vérités extraordinaires ki ena là-dans et li fine enlève bane l'idées fausses ki ti vine banale concernant sa bane l'enseignements là. Kan nous pense lors là ene ti peu plusse, nous pou trouver ki c'est seulement dans ene société ki réformé et bien organisée ki ene dimoune ena meilleur chance pou montrer so bane qualités morales, parski ene dimoune ordinaire pou capave faire bane sacrifices ziska ene certain limite, et kot au-delà de sa li pas pou capave aller pli loin ki sa. Si attendre plisse ki sa de li, c'est comme-ci pé mettre ene pression trop lourd lors so patience. Alors comme résultat, li pou d'abord désorienté et à la fin li pou perdre complètement maîtrise lors li-même.

Par conséquent, ene régime politique réformé li essentielle pour le développement de bane qualités morales d'ene dimoune, sinon bane qualités morales supérieures ti pou confiné à seulement quelques dimounes. Islam traite longuement de sa l'aspé de la vie de l'homme. Islam traite dans bane moindres détails bane droits et bane devoirs d'ene supérieur (ki li ene lé roi ou autre) et d'ene sujet (d'ene dimoune ki travaille enba li), et l'Islam fine cause aussi lors la liberté de l'administration de la justice, le respect de bane droits de l'homme, la relation du maître et de serviteur et bane façons couma pou régler bane différends, ki capave surgir entre zot. Li fine aussi cause lors bane devoirs d'ene citoyen musulman, bane droits de bane pauvres, bane relations entre bane différents religions et bane différents gouvernements, etc., et alors nous oblize admettre ki l'Islam ena place pli élevée, statu ki pli élevé comparer avec bane les autres religions. En séki concerne bane relations entre lé roi ou ene supérieur et so sujet ou employé: d'abord, nous bizin rappelle ki le gouvernement li le serviteur du public et li bizin considère li toujours comme tel. Le Messie Promis Hazrat Mirza Ghulam Ahmad (as) li-même ti possède ene royaume spirituelle, mais concernant li-même, li fine dire avec toute humilité : « *Pas amène ene chaise pou moi, parski mo fine nommé pour servir.* »

Ena deux grands principes de gouvernement, premièrement, ki le gouvernement li là pou servir le public, et na pas ena repos pour ene gouvernement et ki bane ki placé en position d'autorité lors bane les autres bizin sacrifier zot confort au profit de sa travail là et pou consacrer totalité de zot lé temps au service du public. C'est zot devoir pou sacrifier zot propre confort et pour assure le confort de bane les autres. Ene jour, bane dimounes fine vine guette le Messie Promis (as), et, selon la coutume zot fine alle assizé bien humblement à ene distance de sa natte kot Hazrat Massih Maoud (as) ti pé assizé là. Kan li fine trouve sa, le Messie Promis (as) ti bien agacé et li fine exprime so grand mécontentement et li fine dire : « *Mo étonné avec sa bane dimounes là; le Messie fine vini et pourtant, zot pas pé abandonne zot bane vié coutumes. Vine assize près avec moi !* ».

Deuxièmement, l'administration d'ene pays bizin, selon l'Islam, mené avec bane conseils du peuple. C'est le cas aussi pour ene prophète à moins ki li recevoir expressément ene instruction divine lors ene question ki nécessite ene intervention divine directe. Dans le cas du Messie Promis (as) aussi, li ti ena l'habitude pou consulter so bane disciples, et li ti invite zot tout pou donne zot l'idée ou l'opinion, et souvent li ti pé même suivre zot bane conseils, malgré ki li ti ena ene l'opinion différent de saki pou zot, afin ki zot capave apprane l'importance de la consultation. De sa façon là, li fine fer revive l'esprit de véritable démocratie ki l'Islam ti le premier pou introduire dans le monde.

Troisièmement, c'est devoir du gouvernement pou arbitrer bane différends inter-communale ki capave provoke désordre et de sa façon là perturbe la paix publique. Le gouvernement bizin assure la paix et l'ordre public en procurant ene décision de bane questions de controverse à travers l'arbitration. Mais li pas bizin en aucune façon interférer avec la liberté de conscience ou avec bane droits de bane dimounes.

En effet, l'Islam enseigne ene tel respect de bane droits de bane dimounes ki alle ziska enjoindre à ene gouvernement le devoir pou assure à tous bane travailleurs paiement pou valeur complet de zot travaux. Sak gouvernement obligé pou prête attention à n'importe ki différan (problème, disputes ou différences) ki capave affecter l'ensemble de la communauté, mais l'histoire de bane débuts de l'Islam montrer ki même bane travailleurs ti ena parfois bane problèmes kot zot ti bizin approche le gouvernement avec bane plaintes ki zot pas ti pé recevoir zot salaire complet, et le gouvernement (à sa époque là) ti pé écoute toujours zot bane plaintes et enquêter lors là afin pou fer la justice.

Mo termine mo Khutba Jummah ici pour aujourd'hui. Ki Allah (swt) donne moi le *Tawfiq* pou contigné sa Khutba là vendredi prochain, *Insha-Allah. Ameen*. Ki Allah guide nous toujours lors le droit chemin et enrichi nous de So connaissance (*Ilm*). *Ameen*.